

Эмнэг болн эмнэгшргсн газрмудиг ЭЗЛДЖ ОЛЗЛСНДНЬ

Одахн Элстин ясврин-техническ станцин кӧдлмшчнрин болн церглӧчнрин хург болв.

Хург деер, СССР-н Деед Советин Президиумин, 1956 джилн октябрин 20-д гарсн Указас иштӧ, СССР-н Деед Советин Президиумин нерн дее-рӧс, кӱч-кӧлсчнрин депутатнрин Элст балгъсна Советин ахлач ӱр Джимбинов А. М. «Эмнэг болн эмнэгшргсн газрмудиг эзлдж олзлсна тӧлӧ» гидг медальс Элстинск РТС-н механизатормудт ӧгв.

«Эмнэг болн эмнэгшргсн газрмудиг эзлдж олзлсна тӧлӧ» гидг медаль авчкад ӱр Ермаков Г. А. иигдж келв:

— Би ӧмннь Элистинск МТС-д механик болдж кӧдлджӧлӧв. «Колхозн тосхлтин цаарандк делгрлтин болн машинн-тракторн станцин бӱрдӧмджиг онгдаруллгъна» тускар СССР-н Деед Советин тавдгч хуралтин негдгч сессийн Закан гарсна хӧӧн «Страна Советов» колхозин ах механик болдж кӧдлджӧнӧв. Тегӧд

би колохозин эдл-уушиг улм цааранднь делгрӱлхин тӧлӧ кӱч-чидлӧн нӧл уга кӧдлнӧв,— гидж ӱр Ермаков Г. А. ӱгӧн ӧгч тӧгсӧв.

Ленинӧ нертӧ колхозин ах механик болдж кӧдлджӧх ӱр Хорольцев, трактористнр ӱр Богданов Г. Я., Егоров И. И., нань чигн механизатормуд селӧнӧ эдл-ахун производствиг цааранднь ӧӧдлӱллгъ теткхин тӧлӧ МТС-с хулддж авсн техникиг сӧӧнӧр олзлдж, колхозин производствд ик диилвр кӱцӧхвдн гидж итклтӧ ӱгӧн ӧгцхӧв.

Элистинск ясврин - техническ станцин механизатормуд — 120 кӱн «Эмнэг болн эмнэгшргсн газрмудиг эдлдж олзлсна тӧлӧ» гидг медальр ачлгдцхав.

Ӧдгӧ цагт Элст балгъсна колхозмудин техникиг яслгъ сӧӧнӧр теткхин кергт Элистинск РТС-н яслгъна мастермуд социалистическ дӧрлдӧ ӧргӧр делгрӱлджӧнӧ.

А. МАТВЕЕВ.